

Bersih 2.0: Kerajaan Serah Kepada Polis – Najib
mStar Online
Jun 30, 2011
Oleh MAZWAN NIK ANIS dan MUGUNTAN VANAR

SIPITANG (Sabah): Kerajaan menyerahkan kepada polis bagi menangani perhimpunan haram yang dijadualkan pada 9 Julai ini termasuk mengisytiharkan darurat untuk memastikan ketenteraman awam tidak digugat.

Perdana Menteri, Datuk Seri Najib Tun Razak berkata, memastikan kedaulatan undang-undang merupakan tugas polis dan terpulang kepada mereka membuat sebarang keputusan.

"Terpulang kepada polis mereka mengikut situasi. Itu tanggungjawab mereka," katanya kepada pemberita selepas melancarkan Pesta Gata 2011 di sini, Khamis sebagai mengulas dakwaan pembangkang bahawa kerajaan mungkin mengisytiharkan darurat bagi menangani perarakan Bersih 2.0.

Dalam pada itu, Perdana Menteri menolak dakwaan bahawa Malaysia semakin tidak demokratik apabila apabila menghalang demonstrasi jalanan.

Kata beliau, proses pilihan raya negara ini dikagumi dan dihormati dunia sebagai yang adil serta bebas dengan pembangkang turut merampas beberap negeri sebagai buktinya pada Pilihan Raya Umum 2008.

Bagaimanapun, Najib menegaskan bahawa kerajaan menunaikan tanggungjawabnya kepada pengundi yang mahukan negara yang selamat dan stabil.

"Perarakan ada kebarangkalian bertukar kepada rusuhan. Sebab itu kita tidak boleh pandang ringan. Ini sukar dikawal dan jika berlaku akan menggugat rakyat dan negara," tambah beliau.

Hakcipta Terpelihara © 1995-2011 Star Publications (Malaysia) Bhd (Co No 10894-D).

Source:

http://mstar.com.my/berita/cerita.asp?file=/2011/7/4/mstar_berita/20110704132358&sec=mstar_berita